

Na osnovu člana 30. stav (1) tačka g) i stav (2) i člana 37. stav (3) Zakona o platama i naknadama u institucijama Bosne i Hercegovine („Službeni glasnik BiH“, br. 50/08 i 35/09), člana 15. st. (1) i (3) Zakona o Državnoj agenciji za istrage i zaštitu („Službeni glasnik BiH“, br. 27/04, 63/04 i 35/05) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 96. sjednici, održanoj 20. avgusta 2009. godine, donijelo je

ODLUKU

o načinu i postupku ostvarivanja prava pojedinih izabranih i imenovanih lica u institucijama Bosne i Hercegovine na troškove smještaja

Član 1.

(Predmet Odluke)

Ovom Odlukom uređuje se način i postupak ostvarivanja prava pojedinih izabranih i imenovanih lica u institucijama Bosne i Hercegovine na troškove smještaja u skladu sa članom 37. stav (3) Zakona o platama i naknadama u institucijama Bosne i Hercegovine u situacijama kada to zahtijevaju posebni uslovi vezani za osiguranje pojedinih izabranih i imenovanih lica.

Član 2.

(Pravo na naknadu)

(1) Korištenje prava iz člana 1. ove Odluke mogu ostvariti zaštićena lica iz člana 15. stav (1) Zakona o Državnoj agenciji za istrage i zaštitu prema kategorizaciji utvrđenoj članom 22. Uputstva o obimu i načinu vršenja poslova fizičkog i tehničkog osiguranja ličnosti, objekata i imovine (VM br. 82/05 i 102/05) na koje se odnose odredbe Zakona o platama i naknadama u institucijama Bosne i Hercegovine ukoliko zaštićena lica ispunjavaju uslove za sticanje prava na naknadu troškova smještaja u skladu sa podzakonskim aktom Vijeća ministara.

(2) Pravo na troškove smještaja izabrana i imenovana lica iz stava (1) ovog člana ostvaruju podnošenjem pisanog zahtjeva instituciji koja na osnovu dostavljenog zahtjeva potpisuje ugovor o zakupu sa stanodavcem.

(3) U slučaju korištenja zaštite, u skladu sa članom 15. stav (3) Zakona o Državnoj agenciji za istrage i zaštitu, od strane lica na koje se odnose odredbe Zakona o platama i naknadama u institucijama Bosne i Hercegovine, ukoliko ta lica ispunjavaju uslove za sticanje prava na naknadu troškova smještaja u skladu sa podzakonskim aktom Vijeća ministara, odobrenje za zaključivanje ugovora sa zakupodavcem daje Vijeće ministara na prijedlog Državne agencije za istrage i zaštitu.

(4) Prilikom zaključivanja ugovora sa stanodavcem na osnovu primjene ove Odluke institucije Bosne i Hercegovine na koje se ova Odluka odnosi dužne su racionalno koristiti budžetska sredstava vodeći računa o tržišnim cijenama smještajnog prostora.

Član 3.

(Izvještavanje)

Rukovodilac institucije Bosne i Hercegovine dužan je, najkasnije do 31. januara tekuće godine za prethodnu godinu, dostaviti Vijeću ministara popis lica koje koriste pravo iz člana 1. ove Odluke.

Član 4.

(Evidentiranje i izmirenje obveza)

Evidentiranje i izmirenje obveza vrši se na osnovu potpisanog ugovora sa zakupodavcem prema uobičajenim procedurama evidentiranja obaveza i njihovog plaćanja preko Informatičnog sistema finansijskog upravljanja (ISFU).

Član 5.

(Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine na koje se ova Odluka odnosi i Ministarstvo finansija i trezora.

Član 6.

(Stupanje na snagu i primjena)

Odluka stupa na snagu narednog dana od dana objavljivanja u "Službenom glasniku BiH", a primjenjivat će se od 01.07.2009. godine.

VM broj 339/09
20. avgust 2009. godine
Sarajevo

PREDSJEDAVAJUĆI
VIJEĆA MINISTARA BIH
dr. Nikola Špirić